

Fiche H2-i Ushkat tsheshkutamatunanut nete innu-
katshishkutamatsheutshuapit

Eshk^u eka tekuaiki neni katshishkutamatsheutshuapa nete innu-assit, uikanishimauat mak anitshenat pessish etaht etaniti auassa, tshishkutamuraushupanat. Ne auass tshishkutamatishupan e tshitapamat auennua e aitatusseniti kie mishta-natutamupan eimiakaniti. Anite atanukanit mishta-mishau anite tipatshimun, tshishkutamuraushun. Muk^u tshiam innu-aimun takuannipan kie apu ut kukuetshi-pashtautunanut ne eshi-aiminanut.

Anitshenat innuat niatshi-apiht anite innu-assit ekue tshitshue tutuakanieht auassat tshetshi tshishkutamuakanieht. Nete upime itishauakanipanat tshetshi tshishkutamuakanieht, kakashteukupeshkueua kie kauapikueshiniti tshishkutamakupanat. Minuat ekue tshimatakaniti katshishkutamatsheutshuapa nete innu-assit. Ne innu-katshishkutamatsheutshuap miam neni mishtikushiu-katshishkutamatsheutshuapa ishi-pimipanipani. Ne mishtikushiu-aimun / kakusseshiu-aimun tshishkutamatshenanuipan miam uinuau uetshit innuat ishi-tshishkutamuakanipanat nenu kutakanu aimunnu. Kassinu tshekuannu kutakanu ashit tshishkutamuakanipanat.

Shashish uet tshishkutamatshenanut innu-aimun nete innu-katshishkutamatsheutshuapit kie upime ka tshimateti katshishkutamatsheutshuapa, 1975 pipun tshitshipannanuipan. Innu-aimun tshishkutamatshenanuipan miam neni kutaka tshekuana, peikuau peikuminashtakana kie apu ut takuaki mashinaikana iapashtakaniti. Ekute uapatakanipan katipan/tatipan etashteti aimuna. Ekue tshissenitakanit eka tshe minupanit tshishkutamatunanuti eka peikutau itashtakaniti innu-aimun mak eka apatenitakaniti nenu mitshetuait eitueht innuat aimitaui.